

Na osnovu člana 15. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06 i 51/09), člana 71, 124. i 125. Statuta Općine Vogošća („Službene novine Kantona Sarajevo“, broj: 27/14 – Prečišćen tekst, 14/15, 9/20 i 23/24), Zakona o pravima branilaca i članova njihovih porodica („Službene novine Federacije BiH“ broj: 33/04, 56/05, 70/07, 9/10, 90/17 i 29/22), Odluke o izvršavanju Budžeta Općine Vogošća za 2025. godinu („Službene novine Kantona Sarajevo“, broj: 1/25), Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj: 37/24) i Odluke Općinskog načelnika o načinu primjene smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine, broj: 02-02-575/25 od 15.04.2025. godine, Općinski načelnik Općine Vogošća, objavljuje

P R A V I L N I K
o kriterijima i raspodjeli novčanih sredstava za dodjelu
jednokratne novčane pomoći boračkoj populaciji za troškove liječenja

Član 1.
(Predmet Pravilnika)

Ovim Pravilnikom utvrđuju se uslovi, način i kriteriji za odobravanje novčane pomoći boračkoj populaciji za troškove liječenje sa područja općine Vogošća.

Član 2.
(Pravo na ostvarivanje jednokratne novčane pomoći)

(1) Lica koja ostvaruju pravo na jednokratnu novčanu pomoć u skladu sa ovim Pravilnikom imaju lica koja imaju priznat status:

- 1) Borca/branitelja BiH;
- 2) Ratnih vojnih invalida i članova njihovih porodica;
- 3) Članova porodica šehida i poginulih i nestalih boraca/branitelja i umrlih ratnih vojnih invalida;
- 4) Organizatora otpora;
- 5) Veterana/prvoboraca;
- 6) Članova porodica umrlih demobilisanih boraca.

(2) Pravo na jednokratnu novčanu pomoć mogu ostvariti lica iz člana 2. tačke 1. ovog Pravilnika za slijedeće:

- za liječenje različitih malignih oboljenja, rijetkih oboljenja i drugih teških bolesti, a na osnovu preporuke Konzilija ljekara nadležne medicinske ustanove;
- za nabavku lijekova koji se ne nalaze na esencijalnoj listi lijekova Kantona Sarajevo;
- za participiranje u troškovima liječenja u inostranstvu, a na osnovu preporuke nadležne medicinske ustanove;
- za posebne potrebe kao što su elementarne nepogode i druge projekte koji se odnose na pomoć boračkoj populaciji.

Član 3.
(Izuzetak ostvarivanja prava na mjesečnu novčanu pomoć)

Izuzetno od odredaba člana 2. ovog Pravilnika pravo na mjesečnu novčanu pomoć mogu ostvariti lica koja imaju priznat status:

- ratnog vojnog invalida 100% I grupe – paraplegičari koji ostvaruju svoja prava u Službi za boračko-invalidsku i socijalnu zaštitu sa područja općine Vogošća.

Član 4. (Uslovi za ostvarivanje prava)

(1) Uslovi za ostvarivanje prava na jednokratnu novčanu pomoć boračkoj populaciji za troškove liječenja na osnovu Pravilnika su:

- da podnosilac zahtjeva i članovi zajedničkog domaćinstva nemaju nikakvih primanja ili da ukupni mjesečni prosjek primanja, uključujući i primanja po osnovu prava iz socijalne i boračko-invalidske zaštite po članu zajedničkog domaćinstva ne prelaze iznos od 300,00 (tristotine) KM, osim u izuzetnim i opravdanim okolnostima koje će se cijeniti u svakom konkretnom slučaju;
- da podnosilac zahtjeva ima prebivalište na području općine Vogošća;
- da niko od članova porodičnog domaćinstva podnosioca zahtjeva nije vlasnik preduzeća, samostalne ili dopunske djelatnosti;
- da podnosilac zahtjeva i niko od članova domaćinstva podnosioca zahtjeva nije ostvario drugi vid jednokratne novčane pomoći putem Službe za boračko-invalidsku i socijalnu zaštitu.

(2) Izuzetno uslovi za ostvarivanje prava na novčanu pomoć ratnim vojnim invalidima 100% I grupe – paraplegičarima na osnovu ovog Pravilnika su :

- da imaju status ratnog vojnog invalida 100% I grupe – paraplegičar;
- da ostvaruju prava putem Službe za boračko-invalidsku i socijalnu zaštitu;
- da imaju prebivalište na području općine Vogošća.

Član 5. (Nadležnost)

Poslove u vezi ostvarivanja prava propisanih ovim Pravilnikom obavlja općinska Služba za boračko-invalidsku i socijalnu zaštitu.

Član 6. (Sredstva)

(1) Sredstva za dodjelu jednokratne novčane pomoći boračkoj populaciji za troškove liječenja utvrđuju se u Budžetu Općine Vogošća (u daljem tekstu: Budžet Općine) za svaku kalendarsku godinu.

(2) Raspodjela novčanih sredstava za ove namjene vršit će se u skladu sa raspoloživim sredstvima u Budžetu Općine za ove namjene.

Član 7. (Javni poziv i potrebna dokumentacija)

(1) Sredstva sa budžetske pozicije predviđena za ove namjene dodjeljuju se na osnovu javnog poziva koji se objavljuje na web stranici Općine i ostaje otvoren do kraja tekuće kalendarske godine odnosno do utroška planiranih budžetskih sredstava.

(2) Jednokratna novčana pomoć utvrđena ovim Pravilnikom dodijeljivat će se na osnovu podnesenih zahtjeva, a u skladu sa objavljenim javnim pozivom.

(3) Zahtjevi za ostvarivanje prava podnose se Službi za boračko-invalidsku i socijalnu zaštitu.

(4) Zahtjevi će se rješavati po redoslijedu podnošenja.

(5) Dokumentacija koju je potrebno priložiti uz zahtjeve po objavljenom javnom pozivu biti će navedena u posebnom obrascu koji će biti sastavni dio Javnog poziva.

Član 8. (Postupak za ostvarivanje prava)

(1) Postupak za dodjelu jednokratne novčane pomoći provodi Komisija imenovana od strane Općinskog načelnika.

(2) Općinski načelnik imenuje Komisiju za pregled prispjelih zahtjeva po osnovu javnog poziva iz člana 7. ovog Pravilnika.

(3) Komisija će u svakom konkretnom slučaju, iznos odobrenih novčanih sredstava utvrditi na osnovu socijalno materijalnog statusa podnosioca zahtjeva, članova porodičnog domaćinstva, zdravstvenog stanja podnosioca odnosno članova domaćinstva.

(4) Nakon što Komisija utvrdi da su ispunjeni uslovi propisani ovim Pravilnikom, Općinski načelnik putem nadležne Službe donosi Rješenje o ostvarivanju prava.

(5) Zahtjevi koji ne ispunjavaju propisane uslove za dodjelu novčanih sredstava, kao i zahtjeve podnesene nakon utroška sredstava predviđenih za jednokratnu novčanu pomoć za boračku populaciju, odbijaju se Zaključkom Općinskog načelnika putem nadležne Službe, a na prijedlog Komisije.

(6) Protiv Zaključka iz stava 4. i 5. ovog člana može se izjaviti žalba Drugostepenoj stručnoj komisiji Općinskog vijeća u roku od 15 dana od dana prijema Zaključka.

(7) Podneseni zahtjev važi samo za kalendarsku godinu u kojoj je zahtjev podnešen.

Član 9.

(Isplata jednokratne novčane pomoći)

Isplata jednokratne novčane pomoći boračkoj populaciji za troškove liječenja vršit će se uplatom na transakcijski račun podnosioca zahtjeva putem Službe za budžet i finansije.

Član 10.

(Visina jednokratne novčane pomoći)

(1) Minimalni iznos jednokratne novčane pomoći utvrđene ovim Pravilnikom iznosi 150,00 KM, a maksimalan iznos 400,00 KM.

(2) Visina jednokratne novčane pomoći utvrđuje se prema osnovnim i dopunskim kriterijima.

(3) Osnovni kriteriji za utvrđivanje visine jednokratne novčane pomoći je broj članova domaćinstva.

(4) Dopunski kriteriji za utvrđivanje visine jednokratne novčane pomoći su materijalni status porodice i zdravstveno stanje.

Član 11.

(Izuzetak visine novčane pomoći)

Izuzetno od odredaba člana 10. ovog Pravilnika iznos novčane pomoći za ratne vojne invalide 100% I grupe – paraplegičare iz člana 3. ovog Pravilnika iznosi 200,00 KM mjesečno za cijelu kalendarsku godinu. Način isplate će se regulisati posebnim aktom Općinskog načelnika.

Član 12.

(Stupanje na snagu Pravilnika)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

Član 13.

(Prestanak)

Stupanjem na snagu ovog Pravilnika, prestaje da važi Pravilnik o uslovima, načinu i kriterijima za odobravanje jednokratne novčane pomoći licima u stanju socijalne potrebe sa područja općine Vogošća, broj: 09-37-211/23 od 25.01.2023. godine.

Broj: 09-37-1241/25
Vogošća, 13.06.2025.godine

